



**PARTORDING NI ACARA  
PESTA PARJOLO  
PARNINGOTAN ARI HATUTUBU NI TUHAN JESUS**

📖 Ev: Heber 1 : 5 - 12

📖 Ep: Psalmen 97 : 1 - 12

TOPIK :  
**MANOMBA JESUS ANAK NI DEBATA**



**Oikumene  
Inklusif**  
*Orientasi Pelayanan  
HKBP 2024. **Mat 5:45***

**HURIA KRISTEN BATAK PROTESTAN  
Rabu, 25 Desember 2024**

## 1. JOUJOU TU PARTANGIANGON :

U : Huria na hinaholongan ni Tuhan Jesus Kristus, parhorason ma dihita saluhutna ro mandohoti Pesta Parningotan di hatutubu ni Tuhan Jesus Kristus sadari on. SELAMAT ARI NATAL ma dihita saluhutna.

**H : Selamat Ari Natal.**

U : Endehon hamu ma di Jahowa ende na imbaru sada, ai nunga dipambahen Ibana angka halongangan; nunga ditumpahi siamunNa i dohot tanganNa na badia i Ibana.

**H : Marsuraksurak ma ho, ale sandok tano on, mangolophon Jahowa, pangiar ma soaram marolopolop, jala marende ma hamu.**

U : Tadok ma mauiliate tu Debata na mangaramoti pardalanan ni HuriaNa. Jala dibagasan sadarion, tapatupa parningotan hatutubu ni Tuhan Jesus na mamboan haluaon dohot hangoluan di hita. Ala balga ni holongNa tu saluhut na tinompaNa, dilehon do AnakNa na sasada i, asa unang adong na mago nanggo sahalak pe sian hita, alai asa taruli hangoluan na saleleng ni lelengna. Alani dibagasan olopolop dohot las ni roha, marende ma hita!

## 2. MARENDE BE. HKBP No. 57 : 1 – 3 “NUNGA JUMPANG MUSE ARI PESTA I”

*Nunga jumpang muse ari Pesta i, hatutubu ni Tuhanta Jesus i*

*Tuat do Ibana sian Surgo i, mebat tu hita on*

*Hasangapon di Debata, dame, dame ma di jolma*

*Las ni roha ni Debata, hajolmaon muse.*

*Beta, ale dongan tu Betlehem i, itasomba ma Dakdanak na disi*

*Na tinongos ni parasiroha i Debata Ama i*

*Hasangapon di Debata, dame, dame ma di jolma*

*Las ni roha ni Debata, hajolmaon muse.*

*----- jongjong -----*

*Sombanami ma di Ho na tubu on, Ho siboan dame tu portibi on*

*Sai pasaorhon ma tu rohanami on, dameMi o Jesus*

*Hasangapon di Debata, dame, dame ma di jolma*

*Las ni roha ni Debata, hajolmaon muse.*

## 3. VOTUM – INTROITUS – TANGIANG :

U : Marhitehite Goar ni Debata Ama, dohot Goar ni AnakNa Tuhan Jesus Kristus, dohot Goar ni Tondi Parbadia na tumompa langit dohot tano on. **Amen.** Nunga tubu di hita sada posoposo, dilehon tu hita sada Anak, pampe tu abaraNa do sogot harajaon, jala bahenonNa GoarNa : Sipartahi halongangan, Ulubalang ni Debata Ama, saleleng ni lelengna, Raja ni hadameon. Endehon hamu ma ende na imbaru di Jahowa, endehon ma Jahowa, ale sandok tano on. Pajojor hamu ma ditonga-tonga ni angka na sipelebegu, hamuliaonNa i, ditongatonga ni saluhut bangso halongangan, angka na binahenNa i.

Marsomba ma hamu tu Jahowa marpahean na marhadohoan, angka hitir ma hamu maradaphon Ibana

**H : (Marende)**

*♫♫ Halleluya, Halleluya, Halleluya!*

**U: Martangiang ma hita !**

Ale Tuhan Debata Amanami na dibanua ginjang. Marroha Ama do Ho tu hami halak pardosa na dangol on, ala ni i dilehon Ho do AnakMu na sasada i, Tuhan Jesus Kristus, asa porsea jala dapotan hangoluan marhite sian Ibana. Na mangido ma hami nuaeng tu Ho, suru ma TondiM na badia i tu rohanami, asa manahan hami sahat ro diujungna di bagasan haporseaon na sintong jala asa martua hami marhitehite AnakMu Tuhan Jesus Krsitus, Tuhannami. Amen

**4. MARENDE BE. HKBP No. 605 : 1 – 2 “LAS MA ROHAM”**

*♫♫* Las ma roham Tuhanta ro gumomgom sasude  
Ungkap roham, jangkon Rajam, marende ma sude  
Marende ma sude, marende, Marende ma sude.  
*♫♫* Tano nang laut, harangan i nang awangawang i  
Hauma i, nang sunge i, olophon Raja i  
Olophon Raja i, olophon, olophon Raja i.

**5. PATIK :**

U : Tangihon hamu (Tatangihon) ma Patik ni Debata di Minggu Naparjolo Parningotan Ari Hatutubu ni Tuhan Jesus, sadari on i ma na tarsurat di **Pilipi 2 : 12b** “Mardongan biar dohot lomos ni roha ulahon hamu ma haluaonmuna”  
*I do sahatna. Antong, rap mangido gogo ma hita sian Tuhan Debata!*

**U+H: Ale Tuhan Debata sai pargogoi ma hami mangulahon na hombar tu PatikMi. Amen.**

**6. MARENDE BE. HKBP No. 48 : 5 – 6 “RIA MA HITA SASUDE” BL. 16**

*♫♫* Dibahen i las situtu do rohangkon nuaeng  
Hujangkon Jesus i tutu, ai sonang au dibaen, ai sonang au dibaen. **--Jongjong--**  
*♫♫* Antong hamuna sasude pardosa na tungki  
Sai unkap rohamuna be manjangkon Jesus i, manjangkon Jesus i.

**7. MANOPOTI DOSA :**

**U : Tatopoti ma dosanta martangiang ma hita!**

Ale Tuhan Debata, Ama ni Tuhannami Jesus Kristus, Ho do Debata pargogo na so hatudosan, sitompa nasa na adong, paruhum na tigor, na manguhumi jolma manisia! Na ro do hami tu joloM manopoti dosanami, angka na huula hami marhite sian pangalaosionnami di PatikMu, i ma marhite sian tubutubu ni

rohanami na roa i, nang sian panghataionnami na so ture, ro di pangoloionnami di hisaphisap ni rohanami. Na tama situtu do hona uhumi hami ala ni dosanami i, alai na tarsolsol bagi do hami nuaeng ala ni i. Asi ma rohaM di hami, ale Debatanami. Pardenggan basa jala Parasiroha do Ho ala ni Anak haholongan ni rohaM, Tuhan Yesus Kristus Tuhannami. Sai sesa ma dosanami saluhutna, jala suru ma Tondi Parbadia tu rohanami be, asa tarbahen hami mangoloi Ho dibagasan hatigoran dohot habadiaon, gabe sahat hami tu hangoluan na so ra suda, na pibarbagabagaM di angka na porsea di AnakMu Tuhan Yesus Kristus, Tuhannami. Amen


**Bagabaga ni Debata taringot tu hasesaan ni dosa!**

Songon on do panghaholongi ni Debata di portibi on, pola do AnakNa na sasada i dilehon, asa unang mago ganup na porsea di Ibana, asa hangoluan na saleleng ni lelengna di Ibana. Hasangapon ma di Debata na di ginjang!

**U+H: Amen.**

**(Hundul)**

**8. MARENDE BE. HKBP No. 58 : 4 “MARTUMBUR TUNGKOTUNGKO” BL123**

 Pinuji ma Jahowa na asi roha I, dilehon do AnakNa hangoluantu i  
Girgir ma hita on mamuji Debata ala basaninon.

**9. EPISTEL :**

**U :** Tangihon hamu (Tatangihon) ma Hata ni Debata turpuk Epistel di Mingguntan sadari on, tarsurat di **Psalmen 97 : 1 – 12** Jahowa do Raja, marolopolop ma tano on, marlas ni roha ma pulopulo angka na lan i!

**H : Ombun jala haholomon marimpotimpot humaliang Ibana, hatigoran dohot uhumi ojanan ni habangsaNa.**

**U :** Api mardalan di joloNa manganhon angka aloNa humaliang.

**H : Disondangi angka hilapNa do portibi on, jadi lalolalo tano on marnidasan.**

**U :** Malala do angka dolok songon pantis maradophon bohi ni Jahowa, maradophon bohi ni Tuhan ni sandok tano on.

**H : Dibaritahon angka langit do hatigoranNa, jala sude angka bangsan marnida hamuliaonNa.**

**U :** Ingkon tarurak sogot sude angka sisomba ajiajian, angka na papujipuji dirina mida ganaganaan, ingkon marsomba tu Ibana do sude angka debata sileban!

**H : Dibege Sion do i, jadi marlas ni roha ma, marolopolop ma angka boru ni Juda, ala ni panguhumMu, ale Jahowa!**

**U :** Ai Ho do, ale Jahowa na sun tumimbul, gumomgom sandok tano on, tumimbul situtu do Ho sian nasa debata sileban.

**H : Hamu ale angka na manghaholongi Jahowa, sai hagigihon hamu ma na jat! Ibana do siramoti tondi ni angka na niasianNa, sai paluaonNa do nasida sian tangan ni parjahat.**

**U : Sai tarsabur do hatiuron di partigor, jala las ni roha di angka na unjur marroha.**

**H : Marlas ni roha ma hamu, ale angka partigor di bagasan Jahowa, jala puji hamu ma goarNa na badia i!**

**U : *I do sahatna. Martua do angka na tumangihon Hata ni Debata jala na umpeopsa.***

**U+ H: *Amen.***

#### **10. MARENDE BE. HKBP No. 51 : 1 + 3 “TOLE PUJI MA TUHANTA” BL. 31**

♫♫♫ Tole puji ma Tuhanta tu Ibana ma rohanta  
Asa girgir parententa ale dongan Kristen i.

----- *jongjong* -----

♫♫♫ Sai tandai ma denggan basa ni Jahowa Debatanta  
Dibasahon do AnakNa baen hangoluanta i.

#### **11. MANGHATINDANGHON HAPORSEASON:**

**U : Tahatindanghon ma haporseaonta i, songon na hinatindanghon ni donganta sahaporseaon di sandok portibi on. Rap ma hita mandok!**

**H : Ahu porsea di Debata Jahowa.... d.u *(Hundul)***

**12. KOOR :**

**13. TINGTING :**

**14. KOOR :**

#### **15. PAPUNGU PELEAN HUHUT MARENDE BE. HKBP No. 61 : 1 --- “NA TAU LAS NI ROHA” *(Pel. Ia & Ib)***

♫♫♫ Na tau las ni roha hatutubu ni Jesus Sipalua haholonganki  
Jesus Sipalua haholonganki.

♫♫♫ Tung godang do dosa pangunjungan pe, mangarsahi hita paima mate be  
Mangarsahi hita paima mate be.

-----*Musik*-----

♫♫♫ Na so tarhatahon hamagoan i, aut so tubu Jesus Sipalua i  
Aut so tubu Jesus Sipalua i.

♫♫♫ Tuhan Debatangku Jesus Ho do i, nda tung be mandele na porsea i  
Nda tung be mandele na porsea i.

-----Musik-----

♫♫ Sai tarapul ahu Tuhan dibaen Ho, tua na tumimbul dame jumpang do  
Tua na tumimbul dame jumpang do.

♫♫ Sai mardongan Jesus hinadenggan nii, nang tu au patulus halolomoMi  
Nang tu au patulus halolomoMi.

-----Musik-----

♫♫ Aut diboto dongan na sai burju Ho, ra na marrongoman ro manopot Ho  
Ra na marrongoman ro manopot Ho.

♫♫ Halalas ni roha nang na bernit pe, sai tong tu na denggan panumpakna be  
Sai tong tu na denggan panumpakna be.

-----Musik-----

♫♫ Sai ditatap Jesus sian Surgo i, jolma manisia, tinobusNa i  
Jolma manisia, tinobusNa i.

♫♫ Holsomi holsoNa, dihilala i, sai pasonangonNa na niainNa i  
Sai pasonangonNa na niainNa i.

-----Musik-----

♫♫ *TangantanganonNa na porsea i, laos pasahatonNa tu na sonang i*  
*Laos pasahatonNa tu na sonang i.*

♫♫ *Na mariaia do disi sude, Amen Haleluya, pamujina be*  
*Amen Haleluya, pamujina be.*

**17. K H O T B A H : Heber 1 : 5 - 12**

**18. PAPUNGU PELEAN HUHUT MARENDE BE. HKBP No. 56 : 1 --- “SAI RO MA  
HAMUNA” (Pel. II)**

♫♫ *Sai ro ma hamuna angka na porsea, sai ro ma hamuna tu Betlehem*  
*Ida dakdanak, Sipalua hita*  
*Tasomba ma Ibana, tasomba ma Ibana, tasomba ma Ibana, Rajanta.*

♫♫ *O Raja na sangap Tuhan ni saluhut, ditaon Ho na porsuk di tano on*  
*Ala ni jolma na di hamagoan*  
*Tasomba ma Ibana, tasomba ma Ibana, tasomba ma Ibana, Rajanta.*

-----Musik-----

♫♫ *Hamuna suruan, puji ma Jahowa, rap dohot sude na martua i*  
*Sangap di Tuhan Debata di Surgo*  
*Tasomba ma Ibana, tasomba ma Ibana, tasomba ma Ibana, Rajanta.*

♪♪ *O Jesus Tuhanhu sai naeng pujionhu, pambaenMu di ahu pardosa on  
Ai gabe jolma Ho humophop ahu  
Tasomba ma Ibana, tasomba ma Ibana, tasomba ma Ibana, Rajanta.*

## **19. Tangiang Pelean – Tangiang Ale Amanami - Tangiang Pasupas:**

**P : Tatangianghon ma peleanta.**

Ale Debata, Amanami na di banua ginjang! Ho do haroroan ni saluhut silehonlehon na denggan dohot nasa ulibasa na mauiutus. Hupasahat hami ma sian na nilehonMi tu hami, peleannami tu Ho. Sai jalo ma i gabe uap na hushus di joloM. Pasupas ma i jala ramoti asa huparhaseang hami pelean on, patimbulhon harajaonMu di tongatonga ni huriaM dohot di portibi on. Buhai ma rohanami marhitehite TondiM, asa lam hutanda hami godang ni silehonlehonMi tu hami, asa lam girgir hami mandok mauiate tu Ho, marhitehite Jesus Kristus Tuhannami. Amen.

**H : (Mangendehon)BE. HKBP No. 204 : 2 “NDANG TADINGHONONHU HO” BL 73**

♪♪ *Nasa na nilehonMi, tondi ro di pamatanghu  
Hosa dohot gogongki, ro di saluhut artangku  
Hupasahat i tu Ho, na so unsatonhu do.*

**P :** Ale Tuhan Debata, Debata na tongtong, na so marmula, na so marpansohotan! Hupuji hami ma Ho, ala saut sude tahiM, naung sinangkapMu, andorang so marojahan dope hasiangan on. Ndang tarambat sibolis sangkapMu, ndang sundat tahiM na badia i dibahen dosanami, ala holong ni rohaM na balga na so hadodoan i. Dibahen i, mauiate ma rohanami tu Ho, ala naung saut sangkapMu, i ma parsuruM di AnakMu gabe Sipalua jala Sipangolu di hami, asa malua hami sian dosa, hamatean dohot sian uhum jala mansohot hami mangulahon dosa. On pe, sai asi ma rohaM di hami, togihon ma hami tu AnakMu. Sai bahen ma hami gabe sialuaM tu Ibana, asa upa ni halojaonNa hami, ala na tinaonNa na bernit i dohot hangaluton humophop hami, asa Ibana nampuna hami, jala hami nampuna Ibana.

Sai sungguli ma huriaM sadari on, asa diingot habalgaonMu dohot haroro ni AnakMu gabe jolma, laho pangoluhon hami pardosa. Sai sungguli ma angka Parhalado di HuriaM, mamaritahon Barita na Uli tu saluhut halak, naung patar hasangaponMu, jala naung jumpang dame dohot hasonangan.

Sai lehon ma pintu na unkap tu halak na so tumanda Ho dohot tu parugamo na asing asa ro nasida mangoloi Tuhannami Jesus Kristus. Sai rajai ma saluhut panggomgomi dohot angka suruanna, asa diboto nasida naung dilehon ho

Raja, jala Tuhan na sumurung i ro di saleleng ni lelengna. Sai lehon gogo tu angka na dibagasan pangunjunan, apuli angka na marsak jala palua angka na targogot. Sai tatap jala ondingi angka na pinaburuburu ni halak ala ni GoarMu. Sai dongani jala pasupasu hami sude, angka na magodang ro di dakdanak dibagasan Tuhan Yesus, Tuhannami. Amen.

Ale Amanami na di banua ginjang! Sai pinarbadia ma GoarMu! Sai ro ma harajaonMu! Sai saut ma lomo ni rohaM di banua tonga on songon na di banua ginjang! Lehon ma tu hami sadari on hangoluan siapari! Sesa ma dosanami songon panesanami di dosa ni dongan na mardosa tu hami! Unang hami togihon tu pangunjunan! Palua ma hami sian pangago!

**H : (Mangendehon): BE HKBP No. 841 : 1 “AI HO DO NAMPUNA HARAJAON” BL 841**

*♪♪♪ Ai Ho do nampuna harajaon, dohot hagagoon  
Ro di hasangapon, saleleng ni lelengna, Amen.*

**P : Tangiang Pasupasu**

**H : (Mangendehon ) BE No. 845 : 1 “AMEN, AMEN, AMEN” BL 845**  
Amen, Amen, Amen